



EDITORIAL

Yukot nga pagsalin-urog para ha ika-50 nga anibersaryo han aton Partido

Yana nga Disyembre, hihinumdumon ngan igsalin-urog han bugos nga Partido ngan han katawhan Pilipino an ika-50 katuig nga anibersaryo han Partido Komunista ng Pilipinas. Usa kayukot ngan usa nga rali, katitirok ngan miting an iglalansar han ngatanan nga kadre han Partido, mga Pula nga mangaraway, mga rebolusyunaryo ngan aktibista ha mga pabrika, eskoylahan ngan ha mga base ngan prente gerilya han Bagong Hukbong Bayan.

Maano man kadako o kagrabe an mga opensiba militar, diri mapupugngan han rehimen Duterte ngan Armed Forces of the Philippines an pagsalin-urog han katawhan Pilipino. Ha kamatuoran, ha pipira nga lugar, nakaglansar na han temprano nga pagsalin-urog nga waray man la nahibaruan han pasista nga kaaway. Ha magkadirudilain nga lugar libang an mga kasama ha pangangandam han pagkaon ngan pagpapraktis han pinakamag-upay nga paragkanta, paragsayaw ngan

iba pa nga artista nga naatubang ha iglalansar nga mga pasundayag.

Desperado an AFP nga pugngan an anuman nga pagsalin-urog han rebolusyunaryo nga katawhan. Tungod dinhi labaw pa hini nira nga ginpapakusog an ira mga operasyon militar. Labaw nga waray wantas an panhalikwat han mga sundalo ha mga komunidad ngan kagugub-an nga gindududahan nira nga paglalansaran han

"Yukot...", sundan ha paypay 2

Kampo han CAFGU, ginlipol han BHB

DUHA NGA SUNDALO han 3rd Special Forces Battalion ngan 12 nga elemento han CAFGU an kapturado yana han Bagong Hukbong Bayan-Agusan del Sur kahuman maensirkulo han mga Pula nga mangaraway an ira kampo ha Barangay New Tubigon, Sibagat, Agusan del Sur. Ginhimo an maungod nga opensiba nga waray bubto hadton Disyembre 19, dapit alas-3 han kaagahon. Nakumpiska liwat han BHB-NEMR an usa nga M60 masinggan, 17 nga M16, upat nga M14, duha nga M4 carbine, usa nga Harris radio ngan gatus-gatos nga bala.

Ginpasidunggan han katawhan an madinaugon nga opensiba han hukbo han katawhan. Kaupod an nasering nga detatsment ha masobra

"Kampo...", sundan ha paypay 3

"Yukot...", *tikang ha paypay 1*

mga katitirok. Nagdudurot han duro nga kasamukan ha mga residente an pagpapauran han mga bala ngan bomba han mga kanyon ngan helikopter hini nga mga lugar.

Ha ngaran han "pag-ulang ha mga pag-atake han BHB," nagtambak an estado han mga pulis ngan sundalo ha mga tay-aw nga baryo agud bantayan ini. Ini ngatanan ha luyo han unilateral nga pagdeklarar han PKP ngan BHB han temporaryo nga ukoy-bubto agud tagan-dalan an mga selebrasyon, ngaduha an tradisyunal ngan rebolusyonaryo. Andam an PKP ngan BHB nga bawion an deklarasyon kung magin dis-bentaha ini atubangan han waray-wantas nga mga opensiba han kaaway.

Magdeklarar man an rehimen US-Duterte han temporaryo nga ukoy-bubto o diri ha kapaskuhan, piho an pag-buylong han mga operasyon militar ngan kampanya han pan-gigipit hini pagsakob han bag-o nga tuig. Napahilawig na ni Rodrigo Duterte ha sunud-sunuran nga Kongreso ngan Senado an balaud

militar ha Mindanao. Napahiluag na ini niya ha iba pa nga parte han nasud pinaagi han Memo Order 32. Pormal na liwat niya nga gintindogan National Task Force agud tapuson kuno an armado nga banggaay pinaagi han "whole-of-nation approach." Kadungan han dirudiretso nga militarisasyon han burukrasya sibil ngan pagpapadeklarar ha PKP ngan BHB komo mga "terorista" nga organisasyon iginpapatuman na ni Duterte an balaud militar ha bug-os nga nasud.

Ha paglalansar han tagdagko nga mga operasyon militar, ginwaldas ni Duterte an kwarta han nasud ha pagpalit niya han dugang nga mga bala, pusil, kanyon, mortar, rocket, helikopter ngan drone. Mga karat-an ini ha katawhan nga gin-aatake han iya mga tropa.

Ginhuhugay niya an mga ordinaryo nga sundalo han ginpadako nga suhol, ngan han diri pa la maiha, pinansyal nga ayuda ha mga elemento han CAFGU, samtang ginpapatambok an dagko nga ginpaburan nga upisyal han ura-ura kadagko nga pundo agud kurakuton ngan kawaton. An tinuod nga katu-

yuan ni Duterte amo an paliton an suporta ha iya pasista nga rehimen. Karuyag niya nga gamiton an AFP agud panginlabotan ngan manipulahon an resulta han eleksyon 2019, kun madayon man gud, agud palingkuron an mga kandidato nga pabor ha iya tiraniya ngan ha paghahadi militar han AFP.

Ha kaluyo hini, nagtitikahilarum an pagdiri han mga ordinaryo nga sundalo han AFP ha dunot ngan kriminal nga rehimen Duterte. Ura-ura hira nga ginpagul-an ha waray ukoy nga mga operasyon militar ngan pagbala ha ira ha kanyon ni Duterte. Samtang labaw nga nangangalas an katawhan ha ginhihimo nga hiluagan ngan piniritay nga rekrutment han AFP han CAFGU.

Kadungan han pagsalin-urog, kinahanglan mag-andam an katawhan ha mas grabe pa nga mga atake ha ira kinabuhi ngan mga katungod. Kinahanglan pahugton han katawhan an pag-ato ha naeksister na nga balaud militar ha bug-os nga nasud.

Kinahanglan himuon an ngatanan nga panalinguha agud pag-usahon an ngatanan nga mga pwersa ngan hiluag nga masa para pakyason an tiraniko nga paghahadi ngan balaud militar ni Duterte ha katuyuanan nga patalsikon an iya rehimen. Kabigon an ngatanan nga organisasyon ngan personalidad agud ibuksas ngan banatan an mga krimen ngan grabe nga kurapsyon ni Duterte ngan han iya bar-kadahan. Kadungan hini, kinahanglan pakusgon an sikreto nga kagiusan agud pakyason an brutal nga mga atake han rehimen.

Kinahanglan maglansar an BHB han natikadamo nga taktikal nga opensiba kontra ha pinakalanong nga mga yunit han AFP ngan PNP nga aada ha luyo han pinakagrabe nga pagtalapas ha katungod pantawo ngan abuso militar. Nadadabi liwat ini hira ha mga kriminal nga aktibidad nga nagtatarget ha ordinaryo nga molupyo, ngan protektor han makahiribang nga mga operasyon ha mina, komersyal nga plantasyon ngan iba pa nga mapandambong nga korporasyon. Ini hira an pinakanagdedestroso ha pakabuhian han katawhan. AB

 <p>ANG Bayan</p> <p>Bolyum XLIX Ihap 24 Disyembre 21, 2018</p> <p>Igin-gagawas an <i>Ang Bayan</i> ha yinaknan nga Pilipino, Bisaya, Iloko, Hiligaynon, Waray ngan Ingles.</p> <p>Nakarawat an <i>Ang Bayan</i> han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot han mga suson ngan rekomendasyon ha ikauuswag han aton mantalaan.</p> <p>  instagram.com/sine.proletaryo  @prwc_info  fb.com/groups/prwcnewsroom  cppinformationbureau@gmail.com </p>	<h2 style="text-align: center;">Gin-uunod</h2> <p>Editorial: Yukot nga pagsalin-urog para ha ika-50 anibersaryo han aton Partido 1</p> <p>Kampo han CAFGU, ginlipol han BHB 1</p> <p>19 nga bag-o nga medik ha CamNorte 3</p> <p>Mga protesta 4</p> <p>Terorista nga paghahadi ni Duterte 6</p> <p>Todo-operasyon ha NCMR 8</p> <p>Priso pulitikal, namatay 8</p> <p>Balay han lider-trabahador, ginsunog 8</p> <p>Balaud militar, utro nga ginpahilawig 9</p> <p>Mga krimen ni Bush Sr. 10</p> <p>CPI-Maoist, naglansar han plenum 11</p> <p>Protesta han mga "yellow vest" 11</p>
<p>An <i>Ang Bayan</i> igin-gagawas duha kabeses kada bulan han Komite Sentral han Partido Komunista ng Pilipinas</p>	

100 kampo han Northeastern Mindanao nga nagseserbe nga pugaran han mga kriminal ngan paragpamuno han mga kontra-sosyal nga aktibidad. Lanong liwat hira ha pangilkil ha gudti nga magtotroso ngan minero ngan negosyante ha lugar.

Sigon kan Ka Sandara Amihan, tagapagyakan han BHB ha prubinsya, an mga nabihag nga sundalo ngan CAFGU makatawo nga gintrato. Nagpahayag naman an Partido Komunista ng Pilipinas nga bubuhian an mga bihag han gerra ha panahon nga ihunong han Armed Forces of the Philippines an mga opensiba hini. Ini agud maseguro an kalibrihan ha pagpahayaw han mga bihag. Nanawagan liwat an Partido ha mga *third-party facilitator* nga makigsumpay ha natutungdan nga kumand han BHB para ha pagpahayaw han mga bihag.

Gindayaw liwat han PKP an madinaugon nga opensiba han BHB-Sorsogon hadton Disyembre 17 han gab-i. Ginpabuthan han mga Pula nga mangaraway an istasyon han pulis ha sentro han bungto han Magallanes, kasunod an pag-atake liwat ha kampo han PNP Mobile Force ha Barangay San Ignacio, Gubat. Tulo nga pulis an samaran hini nga mga opensiba.

Ha North Central Mindanao, nahilagum han 14 kaswalti an AFP ha aktibo nga depensa nga iginlansar han mga yunit han BHB ha tubtuban han mga prubinsya han Misamis Oriental, Bukidnon ngan Agusan del Sur. Diri mamenos ha 13 nga agway an nahitabo ha lugar. Iginsumat han mga residente nga duha nga patay nga sundalo an igin-gawas hadton Disyembre 7 han gab-i ha Barangay Hagpa, Impasug-ong, Bukidnon ngan 12 nga samaran naman an sekreto nga ginhakot han mga trak ngan ambulansya pag-abot han katutnga han gab-i ha karaknit nga barangay han Calabugao ha pareho nga bungto. AB

19 bag-o nga medik ha Camarines Norte

MADINAUGON NGA NAILANSAR an pamprubinsya nga pagpapahira ha Batakan nga Kurso Panlawas ha usa nga prente gerilya ilarum han Armando Catapia Command (ACC o BHB Camarines Norte) hini nga Nobyembre. Dise- noybe an nakatangpos tikang ha yunit han hukbo, milisya han katawhan ngan ha mga organisasyon masa ha baryo.

Prinsipal nga ginpaatender ha pagpapahira an matindog nga upisyal medikal han mga yunit han hukbo, milisya han katawhan ngan mga aada ha subkomite ha panlawas han mga organisasyon masa. Kadam-an ha mga umantender limitado pa an eksperyensya ha buruhaton medikal. Kundi tungod kay naintindihan nira an kamahinungdanon han buruhaton ha pagpasulong han rebolusyon, nagin abrido hira nga magpatutdo.

Ha proseso han pagpahira nagin marayhak an partisipasyon han ngatanan nga delegado. Nagin aktibo hira labina ha topiko nga *first aid* tungod kay sigon ha ira, importante ini ha panahon nga magkaka- mayada agway. Nakaghatag han nalalain nga kumpyansa ha mga natindog nga medik han yunit an ira nagin pagpahira. An pakalibre han pasyente an nagin duon han ira panalinguha agud mahibaro han iba-iba nga pamaagi han pagtambal. Para ha mga pultaym ha hukbo, nagin ayat ha ira an pagigin medik ha panahon han mga taktikal nga opensiba han BHB ngan magin ha mga di-gin-aantuman nga depensiba.

Nagduon naman an mga delegado tikang ha mga organisasyon

masa nga makaghatag han serbisyo medikal ha ira baryo. Gindun-an liwat ha pagpahira an kamahinungdanon han "Revolutionary Medical Code of Ethics," kun diin nakaplastar dinhi an tama nga pagtrato han usa nga medik ha igkasi medik, ha pasyente han hukbo ngan masa, magin ha pasyente han kaaway ha panahon han mga agway.

Dako nga kadaugan an pakalansar han nasering nga pagpahira ha butnga han dirudiretso nga mga operasyon kombat ngan "peace and development" han militar ha prubinsya tikang pa hadton Pebrero. Ginlupgop hini nira an walo nga baryo han bungto han Labo ngan naghimo han dirudiretso nga panhahalikwat ngan pagbase ha mga sentro han baryo.

Kahuman han pagpahira kumpyansado an Partido ngan BHB ha Camarines Norte nga kaya nira nga atubangon an atake han kaaway ngan maglansar han tikaagsub nga mga taktikal nga opensiba tungod kay mayda mga medik nga padayon nga magpapauswag ha ira kahiaraan ha butnga han nagtika- paso nga armado nga pakig-away ilarum han diktador ngan pasista nga rehimen US-Duterte. AB



Yukut-yukot nagprotesta ha Pankalibutan nga Adlaw han Katungod Pantawo

Diri mamenos ha 20,000 an nagprotesta ha sobra 20 nga prubinsya ngan syudad han Pilipinas komo paghinumdom ha ika-70 tuig han Pankalibutan nga Adlaw han Katungod Pantawo hadton Disyembre 10. Nagprotesta liwat an mga Pilipino ngan an ira mga tagsuporta ha langyaw nga labnasan.

Ha luyo han balaud militar, nakada ha 10,000 an nagprotesta ha Mindanao. Ginpanhimuwa nira an mga buwa ni Duterte ngan duruyog nga ginkundenar an pag-eksister han balaud militar ngan an utro nga pagpahilawig hini.

Ha Metro Manila, sumobra-kumulang 5,000 an pumartisipar ha United People's March for Human Rights nga ginpangunahan han Bayan ngan Karapatan. Nagmartsa an grupo tikang ha Liwasang Bonifacio, Lawton tikadto ha Mendiola ha Manila.

Kaupod ha protesta an mga Lumad, mga trabahador han Sumifru ngan iba pa nga sektor nga naglakbayan tikang pa ha Mindanao. Nakig-usa liwat an han-ay han mga Dumagat, trabahador ngan paraguma tikang ha Southern Tagalog.

Luzon. Ginpangunahan han Cordillera Movement Against Tyranny ngan Cordillera Human Rights Alliance an pira kagatos nga nagprotesta ha Session Road, Baguio City agud atuhan an pan-gigipit ngan panmuypoy ha mga tagdepena han katungod han mga katutubo.

Ginsulong ngan nagpiket naman an Ilocos Human Rights Alliance ngan Solidarity of Peasants Against Exploitation ha mga panrehiyon nga upisina han gubyerno ha San Fernando, La Union. Naglansar liwat han mga katitirok ngan protesta ha Tuguegarao City, Didipio ha Nueva Vizcaya ngan Bangued, Abra.

Ha Central Luzon, nagmartsa an mga parag-uma ngan iba pa nga demokratiko nga sektor ha pamumuno han Alyansa ng mga Magbubukid sa Gitnang Luzon ha Cabanatuan, Nueva Ecija.

Ha Bicol, pira kayukot nga kaapi han Bayan-Camarines Sur ngan Camarines Sur Ecumenical Movement for Justice and Peace an nagprotes-

ta ha Plaza Oragon ha Naga City. Naglansar han kapareho nga protesta ha mga syudad han Legazpi ngan Sorsogon, ngan mga prubinsya han Camarines Norte, Catanduanes ngan Masbate.

Visayas. Ha Panay, pira kayukot an nagprotesta ha pangunguna han Bayan ngan Karapatan ha usa nga United People's Action against Dictatorship atubangan han Iloilo Provincial Capitol.

Ha Eastern Visayas, ginpangunahan han Bayan an mga paggios han masobra 800 aktibista ha Tacloban, Leyte, ngan ha Catbalogan ngan Las Navas ha isla han Samar.

Sobra 1,000 nga kaapi han Bayan-Negros an gumios ha Bacolod City Public Plaza agud manawagan han hustisya ha pagmasaker ha siyam nga parag-uma ha Sagay ngan pagpatay han abogado nga hi Atty. Benjamin Ramos.

Ha Cebu City, nagmartsa an Bayan ngan Karapatan ha Fuente Osmeña Circle tikadto ha Metro Colon. Ha Bohol, naglansar liwat han programa an mga parag-uma ilarum han Humabol-KMP ngan Gabriela ha City Square, Agora, Tagbilaran City.

Mindanao. Inabot ha 7,000 Lumad tikang ha MAPASU, KASALO ngan mga tagdepena han katungod

pantawo an nagprotesta ha Butuan City, Agusan del Norte. Ginkundenar nira an mabangis nga pag-okupar han mga militar ha mga komunidad ngan eskoylahan han Lumad.

Ginpangunahan naman han Bayan an martsa han 3,000 katawo ha Cagayan de Oro City.

Ha Davao City, ginsukna han mga raliyista hi Mayor Sara Duterte ngan an iya amay ha listahan han pagtalapas ha katungod pantawo. Ginhimo an protesta ha Freedom Park ha nasering nga syudad ha pangunguna han Karapatan. Kapareho nga protesta an iginlansar ha General Santos City ngan Tandag City.

Langyaw nga labnasan. Ha Indonesia, nagprotesta an mga kaapi han International League of People's Struggle ngan People's Struggle Front ha US Embassy ha Jakarta.

Ginios liwat ha Brussels, Belgium an International Coalition for Human Rights in the Philippines (ICHRP) agud suportahan an mga tagdepena han katungod pantawo ha Pilipinas.

Samtang, nagprotesta an mga Pilipino ha pangunguna han ICHRP ha Consulate General of the Philippines, New York City ngan nagmartsa ngadto ha Trump Towers. Iginpanawagan nira an pagpapahunong han ayuda militar han US ha rehimen Duterte.

Kapareho nga paggios an iginlansar ha Vancouver, Canada. AB



Martsa han pagkaurusa kontra demolisyon, iginlansar

Pira kagatos tikang ha mga Distrito 3, 4 ngan 5 han Manila an pumartisipar ha martsa han pagkaurusa hadton Disyembre 9 kontra ha demolisyon.



Ginpartisiparan ini han mga kaapi han Sampaloc People's Alliance ngan Ugnayan ng Mamamayan ng Tatamaan ng Connector Road-PNR Project. Nakig-usa hi Anakpawis Rep. Ariel Casilao ha paggios.

Plano nga magtindog han kalsada an proyekto han Philippine National Railways ha lugar nga magpapaiwas ha masobra 180,000 residente. Gintitipahan liwat han grupo an mga ambisyoso nga proyekto nga imprastruktura han rehimen Duterte ilarum han 'Build Build Build'.

Ha Davao City, nagprotesta hadton Disyembre 15 an mga residente han Catalunan Pequeño Subdivision nga maiigo han Mindanao Railway Project. Masobra 10 subdibisyon an gintantiya nga maapektaran han nasering nga proyekto ilarum han programa nga 'Build Build Build'.

Paggios han mga drayber ngan opereytor han dyip, iginkasa

Naglansar han usa nga nasyunal nga koordinado nga paggios hadton Disyembre 5 an No to Jeepney Phaseout Coalition ngan Pinagkaisang Samahan ng mga Tsuper at Operator Nationwide (PISTON). Igin-insister nira an pagbasura ha buwa ngan makanegosyo nga programa nga modernisasyon han dyip nga titikangan ha Marso 2019.

Nagmartsa an mga drayber ngan opereytor han dyip tikadto ha Land Transportation Franchising and Regulatory Board (LTFRB) ha East Avenue, Quezon City. Nagprotesta liwat an Baguio-Benguet Movement Against Jeepney Phase-Out sa Baguio City ngan an PISTON-Central Luzon atubangan han panrehiyon nga upisina han LTFRB ha San Fernando City, Pampanga.

Hadton Disyembre 10, kadungan han pagpanungog ha badyet han Department of Transportation (DOTr) ha Senado nagtirok an magkalain-lain nga grupo han mga drayber ngan opereytor han dyip, trak, bus ngan UV express agud atuhan an buwa nga modernisasyon ngan mga kontra kablans nga programa han DOTr. Pumartisipar liwat an mga grupo han *truckers* tikang ha Cavite, Laguna ngan Bulacan ngan mga opereytor han bus tikang ha Cavite ngan Batangas.

Nagprotesta naman an masobra 1,000 nga drayber han Angkas ilarum han Riders of the Philippines ha People Power Monument kahuman igdiri han Korte Suprema an operasyon han Angkas. Igin-hangyo nira nga maibalik an operasyon han pribado nga transportasyon para ha ira pakabuhian.



Syahan nga tuig han balaud TRAIN, ginprotestahan

Hadton Disyembre 14, naghimo han usa nga piket-protesta an mga progresibo ha pangunguna han GABRIELA ha Mendiola ha Manila. Kasumpay ini han usa katuig na nga implementasyon han pakuri nga balaud nga Tax Reform for Acceleration and Inclusion. Nagdurot an balaud han paghitaas han presyo han mga batakan nga papliton ha nasud sakob han usa katuig hini.

'Red-tagging' ha Panay, ginkundenar

Nagtirok hadton Disyembre 12 an mga kaapi han Bayan ha Plazoletegay ha Iloilo City para ha usa nga *press conference* ngan piket. Ginkundenar nira an diri pa la maiha nga pagpagawas han mga elemento han estado han mga *poster* nga ginngaranan an mayda 45 nga kaapi han mga progresibo nga organisasyon komo mga "terorista nga komunista". Upod ha mga ginngaranan an mga kaapi han National Union of People's Lawyers, Karapatan ngan League of Filipino Students. Pareho nga paggios an iginlansar ha Aklan kinabuwasan.

Mga tagdepensa han kalibungan, nagprotesta

Kahuman han syahan nga kumperensya han mga tagdepensa han kalibungan hadton Disyembre 7, ginpangunahan han Center for Environmental Concerns ngan Kalikasan People's Network for the Environment an usa nga protesta ha Mendiola ha Manila. Nanawagan hira han hustisya para ha mga ginpatay nga mga tagdepensa han kalibungan.

Igin-insister liwat han mga delegado ha kumperensya an pagpahunong ha mga igintindog nga *megadam*, mga langyawanon nga mina, kapitalista nga plantasyon ngan mga proyekto nga reklamasyon. Sering nira, gintalapas hini an katungod para ha usa nga talwas ngan malibsog nga kalibungan. AB

An nagpapadayon nga terorista nga paghahadi ni Duterte

Kadungan han paghinumdom ha International Human Rights Day hadton Disyembre 10, ginsumada han Ang Bayan (AB) ha usa nga report an mga iginbalita hini nga mga kaso han pagtalapas ha tawhanon nga katungod han Armed Forces of the Philippines (AFP), Philippine National Police (PNP) ngan iba pa nga armado nga ahente han rehimen US-Duterte yana nga tuig. Mababasa an bug-os nga report ha www.philippinerevolution.info.

Nakaglista an AB han abereyds nga 82 kaso han pagtalapas ha tawhanon nga katungod kada adlaw ngan kabug-usan nga 29,869 nga biktima tikang Enero tubtub Disyembre 7, 2018. Maabot ha upat an ginpatay kada duha kasemana samtang diri mamenos ha tulo an ilegal nga gin-aresto ngan gindetiner kada semana. Mayda 12 nga aktibista ngan progresibo naman an ginpahimatngunan, gin-gipit ngan gintarhug kada adlaw. Ini nga report nagpapamatuod ha grabe nga kamutangan han tawhanon nga katungod ha Pilipinas bisan nga damo pa nga iba nga kaso an waray pa maireport ha AB.

Ha pagpapatuman ni Duterte yana nga tuig han National Internal Security Plan (NISP), nga nagtutumuyo kuno nga rumkon an rebolusyonaryo nga



armado nga kagiusan, nagrabe an pasista nga pan-gigipit ha kalibrihan sibil ngan mga demokratiko nga katungod ngan mabangis nga mga atake kontra ha katawhan, labina ha tiniyupi nga masa nga parag-uma, trabahador ngan nasyunal minoriya.

Pagpatay, atentar nga pagpatay ngan tortyur

Basar ha inisyal nga tantiya han AB, diri mamenos ha 106 nga sibilyan an nagin biktima han ekstrahudisyal nga panmatay yana nga tuig. Ha Negros Island nga igintanding ha usa nga bulkan nga napahimatngon nga mabuto tungod ha grabe nga sumpakiay ha tuna, 23 an pinatay, 18 ha ira mga parag-uma. Upod ha mga biktima an siyam nga kaapi han National Federation of Sugar Workers nga ginmasaker han mga elemento han Special Cofgu Active Auxiliary ha Sagay City, Negros Occidental hadton Oktubre 20.

Baynte naman an ginpatay ha Bicol, upod an lima nga sibilyan nga ginmasaker han mga elemento han CAFGU ha Aroroy, Masbate hadton Hunyo 8. Samtang, 44 ha mga bikti-

ma an ginpatay ha Mindanao ilarum han nagpapadayon nga balaud militar.

Dugang pa hini an 47 nga biktima han atentar nga pagpatay, upod

hira Jerry Alicante ngan Victor Ageas, mga kaapi han Nagkahiusang Mamumuo sa Suyapa Farms, nga ginpusil han mga waray makilal-i nga lalaki ha Compostela Valley ha magkabulag nga insidente hadton Nobyembre 11 ngan Setyembre 4.

Diri mamenos ha 37 nga indibidwal an gintortyur, upod an lima nga menor-de-edad nga ginkastigo ngan gintarhug nga patayon han 19th IB hadton Nobyembre 18.

Panmomba, istraping, atake ha mga komunidad ngan piritay nga pagpaebakwet

Naisumat han AB hini nga tuig an 22 nga insidente han waray wantas nga pambobomba ngan/o istraping ngan 54 nga insidente han okupasyon militar ha mga komunidad nga nagresulta ha pag-ebakwet han 24,667 nga indibidwal (gawas pa ha mga residente han Marawi nga nagpabilin pa gihapon ha mga *evacuation center*).

Upat nga insidente han panmomba ngan/o istraping an ginlista ha Northern Mindanao. Samtang, 11 nga insidente han okupasyon ngan atake an ginlista kada taga ha Southern Tagalog ngan Caraga. Nakaglista liwat han tagdagko nga pag-ebakwet han mga residente han Moro tikang ha Autonomous Region in Muslim Mindanao (12,100 nga bakwit) ngan mga residente nga pa-

rag-uma ngan Lumad tikang ha Caraga (8,791).

Upod ha mga pinakamabangis nga aksyon militar an igindireher han US Army Special Forces nga pambobomba ngan panganganyon han AFP Joint Task Force Central ha Shariff Aguak, Maguindanao hadton Setyembre 5 nga nagresulta ha pagkamatay han usa nga sibilyan ngan kasamad han duha pa nga iba;

an istraping ngan panmomba han Joint Task Force Lanao ha tulo nga bungto han Lanao del Sur hadton Hunyo 14-17 nga nagresulta ha pagbabakwit han masobra 11,000 indibidwal; ngan an pira kabeses nga pagpaebakwet han yukut-yukot nga Manobo tikang ha Lianga ngan San Agustin, Surigao del Sur ngan gatus-gatos nga Dumagat tikang ha Gen. Nakar, Quezon tungod ha waray ukoy nga panraugdaug han mga tropa han AFP nga naokupar han ira mga komunidad.

Iligal nga pangaresto ngan detensyon

Yana nga tuig, diri mamenos ha 271 an iligal nga gin-aresto ngan gindetiner han mga elemento han AFP ngan PNP. Dugang hini an 407 nga biktima han arbitraryo nga detensyon.

Ha Central Luzon, 50 nga kaso han iligal nga pag-aresto ngan detensyon an naisumat. Upod ha mga biktima an 42 nga gin-aresto han PNP-Meycauayan ha NutriAsia ka-human an mabangis nga mga *dispersal* han piket han nagwewelga

nga mga trabahador atubangan han pabrika ha Marilao, Bulacan hadton Hunyo 14 ngan Hulyo 30.

Ha rehiyon han Davao, maabot ha 45 an iligal nga gin-aresto ngan gindetiner. Kaupod ha mga pinakamakangirhat nga kaso an iligal

nga pag-aresto ha 18 nga lider ma-sa ngan aktibista nga ginsalawdan han hinimuhimo nga kaso han *kidnapping* ngan *human trafficking* ha Tagum City hadton Nobyembre 29. Usa kaadlaw antes hini, arbitraryo nga gindetiner han mga elemento han estado an mga biktima upod an 61 nga iba pa ha Talaingod, Davao del Norte.

Panarhug, pan-gipit ngan panhadlok

Diri mamenos ha 4,282 nga indibidwal an gintarhug, gin-gipit ngan ginhadlok yana nga tuig. Maabot ha 1,659 an mga biktima tikang ha Caraga, 1,600 ha ira nga ebakwet nga Manobo nga gin-gipit han mga tropa han 75th IB samtang tikadto tubtub ha pag-abot nira ha *evacuation center* hadton Hulyo 16-18.


Upod liwat ha mga biktima an mga konsultant han National Democratic Front of the Philippines nga hira Rey Casambre, Adelberto Silva, Vicente Ladlad ngan Rafael Baylosis nga iligal nga gin-aresto yana nga tuig. Kaupod hira ha 600 nga ngaran han mga aktibista ngan personalidad ha pulitika nga iginlis-

ta ha kaso nga proskripsyon han rehimen.

Diri pa la maiha, igin-gawas han rehimen an Executive Order 70, nga nagtindog ha National Task Force (nga magpapatuman kuno ha "whole-of-nation approach" nga ginpurot ha konsepto nga "whole-of-government" nga nakaplastar ha

Counter Insurgency Guide han US State Department hadton 2009), ngan Memorandum Order 32 (nga direkta nga nagdeploy han dugang nga mga batalyon ha tulo nga rehiyon agud kuno atuhan an "kamabangis ngan terorismo") agud padagmiton an pag-iinstitusyonalisa ha NISP. Instrumento ini nga iskema para ha pagtindog han pasista nga diktadura ha bug-os nga nasud, piho nga labaw pa nga magrabe an pan-gigipit ha masunod nga tuig.

Ha bulag nga mga sumat, nakagalista ha Southern Mindanao han diri mamenos ha 90 nga kaso han ekstrahudisyal nga panmatay ilarum han rehimen Duterte. Hini nga ihap, 21 an nahitabo tikang Enero tubtob Nobyembre yana nga tuig. Dose ha mga biktima tikang ha Compostela Valley nga gin-ngaranan nga "lambak han kamatayon." Maabot naman ha 27 nga sibilyan an iligal nga gin-aresto yana nga tuig, kun diin unom ha ira aada pa ha detensyon ngan dugang ha 49 nga iba pa nga priso pulitikal ha rehiyon nga gin-aresto ngan gindetiner ilarum han rehimen Duterte. Samtang, ha North Central Mindanao, 927 nga indibidwal naman an ginsalawdan han hinimuhimo nga kriminal nga kaso.



Todo-operasyon han AFP ha Northern Mindanao, peste ha katawhan

Gin-ambus han Bagong Hukbong Bayan (BHB)-Bukidnon an mga sundalo han 8th IB hadton alas-2 han aga han Disyembre 20 ha Sityo Nasandigan, Barangay Kalabugao, Impasug-ong, Bukidnon. Tulo an napatay ngan duha an samaran ha mga sundalo han tipagawas nga tikang ha operasyon.

Gin-ambus han Bagong Hukbong Bayan (BHB)-Bukidnon an mga sundalo han 8th IB hadton alas-2 han aga han Disyembre 20 ha Sityo Nasandigan, Barangay Kalabugao, Impasug-ong, Bukidnon. Tulo an napatay ngan duha an samaran ha mga sundalo han tipagawas na tikang ha operasyon.


An yunit nga gin-ambus kaparte han todo-operasyon ngan waray wantas nga panmomba nga ginhimo han Armed Forces of the Philippines (AFP) ha mga tubtuban han mga prubinsya han Misamis Oriental, Bukidnon ngan Agusan del Sur tikang pa hadton syahan nga semana han Disyembre. Kaparte ini han pag-aatentar han AFP nga pugngan an mga pangandam para ha pagsa-

lin-urog han Pasko ngan Bag-o nga Tuig ha mga komunidad hini.

Labot ha 8th IB, ginpagios liwat han rehimen US-Duterte an masobra 400 tropa tikang ha 58th IB, Charlie Company han 4th ID, 4th Division Reconnaissance Company (DRC), Scout Rangers, Special Action Forces han Philippine National Police ngan mga yunit han CAGU. Tikang Disyembre 2-14, diri mamenos ha 43 nga siksabay

nga trak an naghakot han mga sundalo tikadto ha *battle zone*. Haros kada adlaw naghimo han pan-nganyon han 105 *howitzer* samtang nag-

"*Todo-operasyon...*," *sundan ha paypay 9*



Priso pulitikal, namatay

NAMATAY AN PRISO pulitikal nga hi Alex Arias, 63 anyos, samtang nakada ha prisuhan hadton bisperas han pagsalin-urog han International Human Rights Day. Gin-atake hiya ha kasingkasing dapit alas-7:30 han gab-i nga gindeklara nga patay pag-abot ha Rizal Medical Center ha Pasig City. Hiya an ikatulo nga priso pulitikal nga namatay ilarum han rehimen Duterte.

May sakit nga alta-presyon ngan diabetes hi Arias. Anay tagapangulo hiya han Pagkakaisa at Ugnayan ng mga Magbubukid ha Laguna, kaapi nga organisasyon han Kilusang Magbubukid ng Pilipinas.

Gin-aresto hiya hadton Abril 7, 2012 ha hinimuhimo nga mga kaso han *kidnapping* ngan *frustrated homicide*, ngan ginpriso ha Metro Manila District Jail.

Upod hi Arias ha 160 nga may sakit ngan may edad nga mga priso pulitikal nga ginsaaran nga pagawason ni Duterte komo kaparte han pakikipag-maupayan kasumpay ha ertestorya pankamurayawan giutan han National Democratic Front of the Philippines ngan Government of the Republic of the Philippines.

Hadton Nobyembre 28, 2016, namatay durot han atake ha kasingkasing hi Bernabe Ocasla, usa nga lider parag-uma. Samtang nakadto ha prisuhan nagkaada hiya han sakit ha kasingkasing ngan altapresyon. Hadton Setyembre 12, 2017, namatay an 74 anyos nga hi Marcos Aggalao ha Kalinga Provincial Hospital, Kalinga. Natikaaming na hiya ngan mayda sakit nga pulmonya ngan altapresyon.

An pagkamatay han tulo nga priso pulitikal ilarum han rehimen Duterte, sigon ha Karapatan, usa nga mapait nga reyalidad itanding ha ispesyal nga pagtagad kanda anay First Lady Imelda Marcos ngan iba pa nga kilalado nga tawo nga gintuyangan nga makagawas ha luyo nga hira nahusgaran nga nagkasala. AB

Balay han lider-trabahador, ginsunog ha Compostela

GINSUNOG HAN MGA waray makilal-an nga tawo hadton alas-2 han kaagahon han Disyembre 15 an balay ni Paul John Dizon, presidente han NAMASUFA (Nagkahiusang Mamumuo sa Suyapa Farms), ha poblasyon han Compostela ha Compostela Valley.

Naabo liwat an balay han anay NAMASUFA President ngan anay Kilusang Mayo Uno-Southern Mindanao Region Chairperson Vicente Barrios nga nakada ha likuran han balay ni Dizon, ngan an upisina han unyon. An nasunog nga mga balay ngan upisina mga 30 metros an kahirayuan tikang ha Packing Plant 220 han Sumifru.

Syahan na nga gin-atentar nga sunugon an balay ni Dizon hadton Nobyembre 29 ngan pinanmusil kinabuwasan. Nahitabo ini nga mga insidente samtang nagkakampo an mga delegado han NAMASUFA ha ubos han Mendiola. AB

Balaud militar ha Mindanao, utro nga ginpahilawig

Ha ikatulo nga higayon, utro nga ginpahilawig han usa katuig an implementasyon han balaud militar ha bug-os nga isla han Mindanao kahuman aprubaran han Joint Session han House of Representatives ngan Senado hadton Disyembre 12 ini nga hangyo ni Rodrigo Duterte.

Ha botos nga 223-23 ha House of Representatives ngan 12-5 ha Senado samtang mayda usa nga nag-*abstain*, gintugutan utro han Kongreso an maduguon nga paghahadi han militar ha Mindanao.

Gintapo ini han protesta han mga progresibo nga grupo tikang ha Mindanao ngan mga tagsuporta ha pangunguna han Bayan. Samtang ginhimo an *joint session* nagprograma ha gawas han Batasang Pambansa an mismo mga biktima han mga panalapas ha tawhanon nga katungod ha Mindanao. Naglansar liwat an mga trabahador han Sumifru han usa nga simboliko nga *die-in protest* agud ipakita an gatus-gatos nga biktima han paghahadi militar.

Usa nga paggios liwat an ginhimo han mga kabatan-unan

ngan trabahador han Sumifru ha Liwasang Bonifacio, Lawton, Manila kinagab-ihan.

Ha absoluto nga pagdudumara han militar ha burukrasya sibil, labaw nga magrabe an mga pagtala-pas ha tawhanon nga katungod han Armed Forces of the Philippines (AFP) ngan Philippine National Police (PNP). Gagamiton liwat ini han AFP ngan PNP agud palingkuron an mga niyutiyo hini ha eleksyon Mayo 2019.

Sugadman yana nga Disyembre,



ha luyo han mga tradisyunal nga pagsalin-urog waray wantas ngan ginpagrabe an paglalansar han mga operasyon nga dumog han AFP ha mga rehiyon han Mindanao. Ginhalikwat hini an mga komunidad ngan baryo agud isabotahe an mga pagsalebrar han Bagong Hukbong Bayan ha ika-50 anibersaryo han Partido. Ini ha luyo han pagdedeklarara han Partido Komunista ng Pilipinas han usa nga ukoy-bubto ha mga tradisyunal nga adlaw han pagsalin-urog.

AB

"*Todo-operasyon...*," *tikang ha paypay 8*

huhulog han mga bomba an mga MD 520 *attack helicopter*. Nagdurot ini han grabe nga kahadlok ha mga residente nga sibilyan ha lugar. Ginhalikwat han militar an nasering nga lugar agud igduso an Kalabugao Plains Peace and Development Convergence Program (KPPDCP). Ha kamatuoran, nagtikang na hadto pa nga 2016 an mga pangandam para hini nga proyekto nga iginpaagi ha mga ahensya han gubyerno sigon mismo ha sumat han mga nahimo han Technical Working Group.

Gindumaraan han Department of Interior and Local Government an pagpapauswag nga sistema nga patubig, konstraksyon han *spillway*, ngan pangayad han aragian ha Barangay Bulonay tikadto ha Pulangui River.

Samtang, an National Commission on Indigenous Peoples an nanguna ha pagtatalaan han mga tubtuban ngan pagsasatitulo han mga kaapuy-apuyan, ngan pag-*codify* han mga tradisyunal nga balaud. Iginpatuman naman han Department of Environment and Natu-

ral Resources an pagtatanum han 1,330 nga mga puno nga kadam-an diri napupulsan ha komunidad.

Gintapos na liwat han Department of Public Works and Highways an dalan nga nagsusumpay ha Agusan del Sur ngan Bukidnon an Danay-Kalabugao-Adtalawon Road nga may balor nga P752 milyon. Katuyuanan hini nga pagdagmiton an pagsakob han mga materyales ha maguba nga parte han Kalabugao para ha KP-PDCP.

Nagrekluta liwat han mga regular nga kaapi han Philippine Army ha mga komunidad han Kalabugao agud magdumara ha "kamurayawan" han lugar.

Damo pa nga iba nga ahensya an ginpagios para maipatuman ini nga proyekto agud kuno "mapauswag" an Kalabugao nga 'ginbibiktima' han Bagong Hukbong Bayan. Patikang nga implementasyon na liwat ini han "whole-of-nation approach" subay ha National Internal Security Plan han rehimen Duterte.

Durot han padayon nga atake

han militar, nabulabog an pakabuhi han mga residente nga Lumad. Ura-ura nga naapektuhan han nagpapadayon nga opensiba han militar han AFP an mga residente ha mga sityo han Lakbangan ngan Kalhaan ha Barangay Minalwang, Claveria, Misamis Oriental. Apektado liwat an mga barangay han Kalabugao, Bulonay ngan Hagpa ha bungto han Impasug-ong, Bukidnon, ngan ha Sityo Kulili, Barangay San Vicente, bungto han Esperanza, Agusan del Sur.

Samtang, ha luyo han pagdedeklarara han Partido Komunista ng Pilipinas ngan BHB han usa nga temporaryo nga ukoy-bubto kadungan han pagsalin-urog han Pasko ngan Bag-o nga Tuig, nagdeklara an AFP nga diri ini magpapatuman han ukoy-bubto.

Ha paglalansar han warayhunong nga operasyon kombat han AFP, ginbuhusan hini han mataghum nga tubig an paglaum han ira mga sundalo nga magkamayda han halipot nga bakasyon upod han ira pamilya.

AB

An mga gintahuban nga krimen ha gerra han namatay na nga hi Bush

Ura-ura an pagdayaw han masmidya han US kan anay presidente George Herbert Walker Bush o Bush Sr. han kamatay hini hadton Nobyembre 30. Katuyuanan hini nga mga pagdayaw han matuyaw nga masmidya ngan elitista nga pulitiko amo nga ilubong ha kalimot an mga krimen ha gerra ngan he-nosidyo nga panarhug han imperyalista nga US. Kundi para ha mga kritiko ni Bush Sr., diri san-o pa man mahingalimtan an iya krimen ha katawhan han kalibutan.

Ha partikular, diri mahingalimtan an mga krimen ha gerra ni Bush Sr. ha 1991 Gulf War kun diin nakilala hiya komo "berdugo han Baghdad," ngan may baratunon ha pagkamatay han maabot 200,000 nga Iraqi hadton 1991 Gulf War nga nagin kinaiyahan han grabe nga "aerial bombardment" ha kasaysayan han gerra.

Mga pagbinuwa para ha gerra

Sigon ha iya mga kritiko, nagbinuwa hi Bush Sr. agud ilarga an imperyalista nga gerra kontra ha Iraq. Gin-gamit niya an propaganda ha damo nga nataran agud padakuon an suporta ha gerra nga agresyon ha Persian Gulf. Kahuman sakupon han Iraq ilarum ni Saddam Hussein an karaknit nga guti nga nasud han Kuwait hadton Agosto 1990, dayon nga gintrabaho ni Bush Sr. nga iladawan hi Saddam nga usa nga "tarhug ngan peste ha kalibutan."

An waray ginsering ni Bush Sr. amo nga an mismo embahador han US ha Iraq hadto nga hi April Glaspe amo an naghatag pagtugot kan Saddam hadton Hulyo 1990, usa kasemana antes atakihon ngan sakupon an Kuwait.

Agud dirudiretso nga suporta han an 1991 Gulf War, ginkundenar ni Bush Sr. hi Saddam komo brutal nga diktador nga natalapas ha internasyunal nga balaud ha pagsakop ha Kuwait, ngan nga hiya usa nga tarhug ha nasyunal nga seguridad han Amerika. Ginpalandaw ni Bush Sr. an karukayaknon han tawhanon nga katungod ha iya magarbo nga mga pulong ngan igin-tanding hi Saddam komo "nabuhi nga Hitler".

Naghinimo han estorya an US hiunong kuno ha brutal nga pagpatay han mga sundalo nga Iraqi ha

mga puya ha mga ospital han Kuwait. Nagtestigo ha US Congress an usa nga 15 katuig nga babaye nga Kuwaiti nga ginngaranan la nga hi "Nayirah" nga nakasaksi kuno ha pagsakob ha mga ospital han mga tropa nga Iraqi. Ngay-an, hi Nayirah anak han embahador han Kuwait ha US ngan gintreyning han usa nga kompaniya han *public relations* ha pag-atubang niya ha kongreso. Ha sumat han Canadian Broadcasting Corporation, waray hira nakita nga ebidensya han ginsering nga pagpatay ha mga puya.

Ginkampanya ni Bush Sr. nga kinahanglan patalsikon an pwersa ni Saddam ha Kuwait tungod ha kasaysayan hini han paggamit han armas kemikal ngan pagpapauswag kuno han armas nukleyar. Ha luyo nga may kahibaruan ngan pagtugot han US, gin-akusaran ni Bush Sr. an hadto-anay nga alyado nga hi Saddam nga nagamit han armas kemikal kontra ha Kurds ha syudad han Halabja hadton 1988 nga nagresulta ha pagkamatay han 6,800 nga kadam-an mga sibilyan. Nabuksas hini nga katapusan ha mga dokumento nga iginpagawas han gubyrano nga US nga sentral nga katuyuanan ha paglansar han gerra kontra ha rehimen ni Saddam amo an interes hini ha lana. Ha National Security Directive 26 hadton 1989 ngan National Security Directive 54 hadton Enero 1991 nga ginpirmahan ni Bush Sr. pareho nagdeklara nga importante an lana ha Middle East ha nasyunal nga seguridad han US ngan padayon nga magamit han pwersa an US agud panalipdan ini nga interes.

Ipokrito ngan usa nga dako nga panguwat ha publiko han gubyrano nga Bush Sr. an pag-akusar nga natirok hi Saddam han armas kemi-

kal kun diin bilyun-bilyon nga dolyar an iginhatag han US ha Iraq komo ayuda militar ngan pan-ekonomiko tikang dekada 1980 tubtub ha pag-atake ni Saddam ha Kuwait.

Hadton 1992, iginsumat ha usa nga prominente nga telebisyon ha US nga gintutugutan (ngan pirme nga gin-aaghat) han mga rehimen Reagan ngan Bush Sr. an pag-awas han kwarta, mga kemikal, mga pautang pan-agrikultura, *dual-use technology* o pagtutugot nga magpauuswag han armas kemikal, ngan higamit pan-gerra ha Iraq.

Mga krimen ha gerra

Naglansar han gerra kontra ha Iraq an pwersa nga koalisyon nga ginpamunuan han US hadton Enero 17, 1991 ngan dagmit ini nga natapos ha pagkaperdi ni Saddam. Ha proseso hini nga gerra, naghulog an US han 88,500 nga tonelada nga bomba ngan ha gin-okupar hini nga Kuwait, nga nagresulta ha pagkamatay han damo nga sibilyan.

Ha usa nga sumat pananglitan hadton 1991, diri mamenos ha 408 an napatay nga sibilyan nga Iraqi ha panmomba ha usa nga *air-raid shelter* ha komunidad han Amiriyah ha Baghdad, kabisera han Iraq. Sigon ha Human Rights Watch (HRW), maaram an US Defense Department nga an pasilidad ha Amiriyah gin-gamit nga usa nga *civil defense shelter* hadton panahon han gerra nga Iran-Iraq, kundi ginatake pa gihapon ini han US nga waray pahimatngon. Usa ini nga seryoso nga pagtalapas ha mga balaud han gerra, pag-akusar han HRW ha administrasyon Bush.

Ginruba han US an mga esensyal nga sibilyan nga imprastraktura han Iraq sugad han mga pasilidad para ha pagprodyuser han kuryente ngan paglimpyo han tubig tubtub ha mga planta han pagprodyuser han pagkaon ngan mga molinuhan han harina. Ha sumat han *Washington Post* hadton Hunyo

"Bush..., sundan ha paypay 11

CPI-Maoist, naghimo han ikalima nga Plenum

GINHIMO HAN PARTIDO Komunista han India (CPI-Maoist) an ikalima nga Plenum hini hadton Nobyembre 2018 ngan nagpili han bag-o nga mga kaapi. Nagsalawad han pagbul-iw komo Pankabug-usan nga Sekretaryo han Partido hi Kasamang Ganapathy agud tagan-dalan an mga mas barubata nga kaapi han Komite Sentral. An iya natikagrabe nga kahimtang panlawas ngan kala-gas an mga basaranan han iya pagbul-iw.

Ginkilala han bag-o nga Komite Sentral (KS) hi Kasamang Ganapathy ha iya amot komo Pankabug-usan nga Sekretaryo han CPI-Maoist tikang pa 1992. Kabakyang an Komite Sentral, ginpamunuan niya an Partido atubangan han mga pagtatampo han mga partido ngan mga internal nga kasamukan. Ha pagkayana naglalansar an CPI-Maoist han usa nga panmaihaan nga gerra han katawhan kontra ha reaksyunaryo nga sistema han India. Sigon ha Partido, yawe nga amot niya an pagpakusog han kolektibo nga pamumuno han Komite Sentral.

Napili han Plenum hi Kasamang Basavaraju agud tumindog komo Pankabug-usan nga Sekretaryo han Partido. Kaapi hiya han KS sakob han 27 katuig ngan han Pampulitika nga Kawanihan han 18 katuig. Ha kabug-usan, ginkatinnan niya an pamumuno ha Central Military Commission, nga nakaamot ha pagsulong han gerra han katawhan ha India.

Ginkilala han Partido nga ini nga mga pagbabag-o tigaman han pagsulong ngan pag-uswag. Nakapagpadig-on liwat ini han pamumuno han Partido ha pankabug-usan nga kaapihan hini, dugang pa nira. Atubangan han SAMADHAN, an kontrarebolusyonaryo nga opensiba han estado, urog hira nga determinado nga mabiksalsipagsulong. AB

"Bush...", tikang ha paypay 10

1991, an pagbomba han mga sibilyan nga pasilidad diri aksidente kundi tinuyo hadton patapos na an gerra. Gatus-gatos kayukot nga Iraqi an nagkamatay komo "collateral damage" bisan kahuman han gerra. Hadto mismo nga bulan, nag-gawas han sumat an usa nga grupo tikang ha Harvard University nga nanhalikwat hiunong ha pampubliko nga kalibsog. Sigon ha sumat, an pagkarumok hini nga mga sibilyan nga imprastraktura nagdurot han malnutrisyon ngan epidemya sugad han kolera ngan tipus.

Ha pag-aaram nga ginhimo hadton Enero 1992 ni Beth Osborne Daponte han US Census Bureau, gintantiya niya nga an 1991 Gulf War nagresulta ha pagkapatay han 158,000 nga Iraqi, kaupod an 13,000 nga direkta nga nagkamatay nga mga sibilyan ngan 70,000 ha pagkahibang ha mga planta han elektrisidad ngan paglilimpyo han tubig.

Nakag-ani han damo nga benepisyo an US ha paglansar han 1991 nga Gulf War. Tungod kay damo nga nasud an gumastos hini nga

gerra nga agresyon, naghakin han dako nga tubo an US ha pagbaligya ngan natestingan an nakaistak hini nga moderno nga mga armas. Labaw hini nga nakontrol an suplay han lana tikang ha Middle East ngan nakakuha han dako nga parte ha kita han lana han Saudi Arabia, Kuwait ngan iba pa nga *emirates* pinaagi han paghigot ha ira ha *military sales contracts* kun diin kontrolado han US an mga moderno nga higamit sugad han mga *antimissile system*.

Hadton 2003, gintanggal han mga upisyal nga US an yukut-yukot nga paypay tikang ha mga sumat han United Nations hiunong ha pag-suplay hini han mga sangkap para ha paghimo han armas kemikal ha Iraq. Sigon ha *Die Tageszeitung*, usa nga mantalaan nga German, imbuelto an 24 nga korporasyon nga nakabase ha US ngan an magkasunod nga administrasyon Reagan ngan Bush Sr. ha ilegal nga pagsuplay ha gubyrno ni Saddam para ha paghimo han armas para ha tagdamo nga pagpatay. AB

Protesta han mga "yellow vest" ha France, nagpapadayon

SINAKOB NA HA ikalima nga semana an mga gios protesta han katawhan Pranses kontra ha sering pa nira kontra-kablas nga mga palisiya han gubyrno ni Emmanuel Macron. (*Basahon ha Ang Bayan Nobyembre 21, 2018.*)

Itanding ha mga naglabay nga paggios, an sinemana nga gios protesta (kada Sabado) hadton Disyembre 15 ha Paris ngan iba pa nga syudad han France sugad han Saint Etienne, Bordeaux ngan Marseille guti ngan kalmado kundi nagpabilin pa gihapon an kangalas han katawhan ha sering nira elitista nga gubyrno.

Ha luyo han pagguti ha rango han mga demonstrador, naduso hi Macron nga magsaad nga ibanan niya an ginsusukot nga buhis ngan dugngan an sweldo han katawhan agud pahugpuyon an kangalas han "yellow vests".

Nakada pa gihapon an pagdududa han katawhan ha gintawag nira nga matamay nga gubyrno. Sigon ha usa nga raliyista, ginsupsop han dako nga presyur han pagbubuhis an enerhiya han nasud, han mga negosyante, artisa-no, gudti nga negosyo, trabahador, samtang an guti nga porsyento han rikuhanon pirme nalikay ha buhis.

Nagtikang an mga gios protesta nga ginngaranan nga "yellow vests movement" hadton Nobyembre 17 tungod kay nagsulot an mga demonstrador han mga *fluorescent vest* nga kasagaran ginsusulot han mga drayber ha nasud kun tigda nga nagkakaproblema an ira sarakyan. An ha pagtikang kontra-buhis nga mga demonstrasyon dumako ngan humiluag ha bug-os nga nasud komo kagiusan nga kontra-gubyrno ngan nagpaluros ha popularidad ni President Macron.

Ginsubad liwat han katawhan ha karaknit nga nasud han Belgi-um an paggios han mga Pranses kontra ha neoliberal nga palisiya han ira gubyrno. AB